



## Notat

Dato: 16.11.2014  
Arkivsak: 2014/13738-5  
Saksbehandlar: tormje

---

Til:

---

Frå: Torbjørn Mjelstad

---

### Kor lang ventetid for å gå opp til fagprøve? Tiltak for å få vekk «køane» for å ta praktisk fagprøve?

Hordaland fylkeskommune avviklar om lag 2700 fag- og sveineprøver. Av dei som går opp, er det om lag 700 praksiskandidatar, dvs. kandidatar som har meir enn fem års relevant praksis. Til å handtere prøveavvikling har fylkeskommunen oppnemnt om lag 700 medlemmer i prøvenemnder. Vi har prøvenemnder i om lag 100 fag. I dei tilfella vi ikkje har oppnemnt prøvenemnd, har vi godt samarbeid med andre fylke om å låne prøvenemnder. Dette fungerer godt.

Praksiskandidatar eller privatistar i fagopplæring har ingen oppmeldingsfrist. Det betyr at når kandidaten har bestått eksamen og kan dokumentere fem års praksis, kan kandidaten melde seg opp. I motsetnad til eksamen som har to fristar i året. Fagopplæringskontoret hadde tidligare også to oppmeldingsfristar i løpet av året, men ein valde å gå vekk frå fristane, då desse var lite føremålstenlege.

Fagopplæringskontoret godkjenner praksis, og når godkjenning er gitt, blir denne sendt vidare til prøvenemnd. I neste omgang vert det eit samarbeid mellom arbeidstakar, arbeidsgjevar og prøvenemnd. Vi er følgjeleg også avhengig av at arbeidsgivar legg til rette for fagprøveavvikling.

Lærlingordninga er omfatta av regelverk knytt til fagprøveavvikling. Fylkeskommunen skal sørge for at fagprøva vert avvikla seinast innan to månader etter læretidsslutt. I Hordaland kan ein også i særlege høve avleggje fagprøva inntil to månader før utløpet av læretida, men ein får ikkje utskrive dokumentasjon før ein har stått ut læretida. I periodar på året har vi eit tydelig fokus på lærlingar. Dei aller fleste læreforhold startar i august-september. Normal læretid er på to år. Dette betyr at i disse månadene vil praksiskandidatar bli prioritert ned. Det betyr ikkje at det ikkje blir avgjort fagprøve for praksiskandidater, men at det i denne perioden kan det ta lengre tid.

Etter vår vurdering er det ingen urovekkjande forhold ved saksbehandlingstida hjå nokon av prøvenemndene. Fagopplæringskontoret er godt innanfor rettleiande sakshandsamingstid, og ville hatt enda kortare sakshandsamingstid dersom vi hadde hatt ein strengare praksis og avvist kandidatar med mangefull dokumentasjon.

Når vi har motteke saker der arbeidspraksis ikkje er tilstrekkeleg dokumentert, har vi lagt oss på ei servicelinje der vi i fyrste omgang kontaktar kandidaten enten pr. telefon eller e-post. Vi orienterer om kva som manglar i saka og gir kandidaten høve til å leggje fram dette innan rimelig tid før saka vert endeleg behandla. Dersom det ikkje vert respondert innan eit par veker, blir det gitt avslag. Dette gjer at sakshandsamingstida vert lengre enn om vi hadde gitt avslag med ein gong.

For praksiskandidatar har vi ei gjennomsnittleg saksbehandlingstid på 22 dagar (mottatt sak sendt til nemnd). Rettleiande sakshandsamingstid er 3 månader.

Etter samtalar med prøvenemnder innan Barne- og ungdomsarbeidarfaget og Helsefagarbeidar, har vi ikkje fått tilbakemeldingar om at kandidatar må vente lenge, men ein kan frå sak til sak oppleve ein forskjell i tida det tar for å få avgjort prøve. Noko skuldast geografi i forhold til kvar kandidaten bur, noko kan skuldast arbeidsgjevar og noko skuldast kapasitet til prøvenemnd. Fagopplæringskontoret slit generelt med å få personar til å delta i prøvenemndsarbeid, og vi får ein del tilbakemeldingar om at det er vanskeleg å få fri til dette arbeidet. Vi har eit stort volum på fagprøver og har over tid god erfaring i å setje opp kva vi treng av medlemmar til dette arbeidet. Medlemmene vert nemnt opp kvart fjerde år, om lag 1/3 av medlemmane vert bytt ut kvar gong.

Det at praksiskandidatar opplever at det tar for lang tid med å få avgjort fagprøve, er noko vi ikkje tar lett på. Vi ønskjer å kome tilbake med ei orientering om i kor stor grad dette er eit problem. Dette krev at vi må gå igjennom samtlege saker dei siste åra og sjå kor lang tid det går frå kandidaten melder seg opp, til dokumentasjon på bestått fagprøve vert skriven ut. Dette er eit omfattande arbeid som vi ikkje har gjort før og som vil krevje noko tid. Ein slik total gjennomgang vil kunne vere klår til februar/mars 2015. Når det gjeld budsjettet i 2015, vil ikkje varsla nedtrekk for opplæringsavdelinga påverke dette arbeidet. Det er budsjettert med same aktivitet i 2015 som i 2014 når det gjeld avvikling av fagprøver.